

Meeqqat atuarfiat pillugu inatsisip allanngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni tuluit oqaasii danskit oqaasii naligalugit minnerni aallartittumik atuartitsissutigineqartalersillugit.

(Inatsisartunut ilaasortaq, Doris Jakobsen Siumut)

Akissuteqaat

(Ilinniartitaanermut Ilisimatusarnermut Nunanullu Avannarlernut suleqateqarnermut Naalakkersuisoq)

Aappassaanerinninneq

Naalakkersuisut Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu ataatsimiititaliaa siunnersuummik sukumiisumik suliarinnissimaneranut qutsavigaa.

Naalakkersuisut siunnersuummik siullermeerinninnermi akissuteqaatiminni ilisimatitsipput kommunit Inerisaavimmik suleqateqarlutik 2010-mi qiterpaanermi meeqqat atuarfiannik nalilersuinerup malitsigisaanik atuartut fagini faginilu qanitariinni angusaannik sukumiisumik misissueqqissaalersimasut.

Aamma ilisimatitsissutigineqarpoq Naalakkersuisut suliamut tassunga isumalluarterujussuusut suliaq tamanna kommuunikkaartumik ajornartorsiutinik suussusersiniarfiusussaammat meeqqallu atuarfianni atuartitsinermi immikkut iliuuseqarfigineqartariaqartunik toqqartuiffiuniartussaammat – aamma allamiut oqaasiinik atuartitsinermit atatillugu. Naalakkersuisut taamaattumik neriupput suliaq tamanna ullumikkut ajornartorsiutaasunut siunnerfeqarluartumik, tigussaasunik anguniagassaliornikkut iliuusissatullu pilersaarusiornikkut iliuuseqarnermik kinguneqarumaartoq – aamma aallamiut oqaasiinik atuartitsinerup iluani.

Ataatsimiititaliap siunnersuutip aappassaaneernissaanut allannguutissatut siunnersuutigaa Naalakkersuisut peqquneqassat UPA2013-imi ataatsimiinnermik kingusinnerunngitsumik isumaliutissiisummik saqqummiussaqaassat, pineqarluni meeqqat atuarfianni tuluttut oqaatsinik fagimi oqaaluttariarsornermi allattariarsornermilu pisinnaasat qaffassarneqarnissaat. Naalakkersuisut isumaqarput periarfissanik pineqartunik misissuinissaq suliniutaareersunut ilanngunneqarsinnaasoq allannguutissatullu siunnersuut akuersissutigineqarnissaa innersuussutigalugu.